

河南先生文集

河南先生文集卷之十六

誌銘

故朝散大夫尚書兵部郎中知蘄州軍州兼
管內勸農事護軍賜紫金魚袋張公墓誌
銘

故大中大夫右諫議大夫上柱國南陽縣開
國男食邑三百戶賜紫金魚袋贈太傅韓
公墓誌銘

故兩浙轉運使朝奉郎尚書司封員外郎護
軍賜紫金魚袋韓公墓誌銘

故朝奉郎尚書司門員外郎通判河南府西
京雷守司兼畿內勸農事上輕車都尉賜
緋魚袋盧公墓誌銘

故西京左藏庫使銀青光祿大夫檢校工部
尚書使持節晉州諸軍事晉州刺史兼御
史大夫充廣南東路駐泊兵馬鈐轄兼提
舉本路巡檢兵馬賊盜公事上柱國太原
縣開國伯食邑九百戶王公墓誌銘

故朝散大夫尚書兵部郎中知蘄州軍州兼
管內勸農事護軍賜紫金魚袋張公墓誌

銘并序

公諱弇字漢臣其先魏郡人唐末從祖有官河陽者舉族因遷河陽世服儒衣冠無顯者父用存光祿少卿母某氏封某郡太君公葬光祿河南遂爲河南人景德二年再舉進士中第歷宣州寧國開封中年二縣主簿泉州晉江尉用薦特改著作佐郎遷秘書丞太常博士知并州榆次揚州天長二縣通判杭州事入尚書省歷屯田都官員外郎知文州蔡州事賜五品服提點開封府諸縣刑獄公事轉司勳員外郎知明州事就遷祠部郎中召還

擢爲刑部郎中荆王府翊善賜三品服兼判司農
寺寶元二年以疾辭出知徐州事進兵部郎中移
蘄州康定元年五月終於郡年六十二公五歲而
孤母夫人携以歸其族從師學旣冠善屬辭博涉
經史河南素多士公晚輩隸然見文采亟與知名
者游衆不敢以門寒後公倜儻尚義節居貧以約
自守未嘗假所不足於人人有伺顏色而進誠者
公審其果善士另承其意後皆重償之無一不報
厚朋友險夷共之人莫能致其間言其人歿雖久
有妄評其短者公嫉之終身爲著作佐郎葬母或

率錢數十萬爲助者公曰吾以士葬親於禮無歉者惡用賻爲乃謝不受其爲政待吏甚察然寬民緩徭不喜刻宰天長尤以治稱有錢蒙吉者作天長善政說以美焉在杭州會軍士以三司所給賚物疏惡喧噪趨牙門公卽馳往諭之乃定璽書

褒美屢平疑獄後得有罪者事登曰佐王府未嘗以柔愉見言色進退必以莊其剛守類皆若此然亦以是卒不顯貴娶陳氏封福昌縣君後公數月而終子彥伯某州某縣主簿慶仲寧州安定主簿慶曆十四年十二月二子奉公及福昌君之喪葬

於河南之龍門山之上銘曰

嗚呼闢放其通強毅其守行隆州邦信在朋友爲
政之仁在民則厚考古循良孰我先後匪豐其祿
又奪之壽獨茲令名是謂不朽者也

故大中大夫右諫議大夫上柱國南陽縣開
國男食邑三百戶賜紫金魚袋贈太傅韓

公墓誌銘

并序

公諱國華字某其先涇州博野人世衣冠舊族四
代祖人賓當王景崇襲有鎮冀四州佐其府累官
檢校太子左庶子兼御史中丞景崇於河朔諸鎮

中輸貢最爲恭順由庶子漸劄以德義故以功名
始終庶子生四子韞辭慎辭定辭昌辭皆以才名
爲王鎔賓屬子時鎔府號多賢士定辭嘗以掌書
記聘幽州時燕客馬或名北門舊儒以博給相尚
或大屈伏昌辭終真定府鼓城令即公之曾祖也
生廣雷府永濟令諱璆避張文禮之難徙趙郡以
文知名與李崧徐台符爲友二公交薦其才會疾
不起徐作詩以爲當世朋友無復繼者李卒以兄
子歸韓氏實趙郡太夫人永濟生太子中允知康
州事諱今上御名始遷相州安陽遂爲安陽人屢爲藩

鎮辟署敏書奏時推其工嘗宰真州清河作條教
諭民以不擾能信其言所至以寬良稱公即康州
之第四子年十九舉進士太平興國二年天子
初御殿覆試上第爲大理評事通判瀘州四年代
還授太子右贊善大夫旋以例補外幙授安德軍
節度判官七年除祕書省著作郎監察州稅雍熙
元年遷監察御史三年假太常少卿使高麗還拜
右拾遺直史館賜五品服四年充三司開拆司推
官尋改主判開拆司累遷左司諫刑兵二部員外
郎帖昭文職賜三品服凡三爲鹽鐵判官又爲左

計司判官判戶部勾院都判三司勾院至道二年以屯田郎中充京東轉運副使移峽路轉運使

真宗聽政遷都官郎中還朝權判大理寺出知河陽咸平四年就遷職方郎中移知潞州景德三年假祕書監使契丹還爲江南巡撫使入權開封府判官四年車駕拜陵權領曹州事召歸授太常少卿知泉州事大中祥符元年拜右諫議大夫四年代還道病三月十一日終於建州之傳舍年五十有五公爲文章不尚靡放靜違而意不窘進止威嚴目不妄視佐彰德軍年尚少鄉里多識公出觀

者夾路或相語得韓公左右顧當具餽酒其重若
此雍熙中王師北伐聞高麗與契丹嘗爲仇怨命
公諭旨以分虜勢公至其王治畏虜無報復意公
爲陳中國威略動以禍福乃承詔然遷延師期公
曰兵不即發不如勿奉詔出不及虜境不若勿發
兵口語激切又繼以書至十返治憚公堅正知大
國不可欺乃命其大相韓光元輔趙杭兵二萬五
千以侵虜且俾光等率將校詣公公猶畱館須其
兵出境乃復命淳化二年契丹大將蕭寧遣人抵
雄州請天子疑其詐命公馳往公代州將劉福

作書與寧鈞致其情得寧荅辭前後反覆無所依
由是悉見其僞狀在三司更張事凡二十七條其
興利使民樂趨而上收其贏其立法使人易守而
難犯故所設置通久而少弊臨上黨會虜寇河朔
上黨與趙魏地最親公辦嚴修訓簡器供餉皆先
事區處民以無憂詔書褒美初太宗親擇材臣
有由外庭小官不旬歲擢用者公忠力不懈天
子浚器其能而爲見忌所擠排故位不甚進然益
任以事留京師凡十年舊三司判官不兼三館職
事公爲鹽鐵特命直昭文館判官帖館職自公始

真宗緣先帝意以名臣待公開封嘗繫囚數百委
公決之江外阻饑命公撫之皆以任事稱北方請
盟之明年公以使往上諭曰卿昔使高麗故以選
卿又顧同使周漸張若谷曰卿凡事當詢韓某公
性既任直無所附合持權者復不爲推引更歷中
外垂四十年位纔諫大夫終時皆歎其滯然公亦
不壽故不究其用迹其行事皆得舒發所蘊未嘗
阻撓又被顧兩朝爲縉紳屬目非不遇也公旣沒
衆人之有知者相與趨建陽拜奠朝夕哭詣浮圖
營齋以報公德其寬愛感人至此公開達有度量

與人語言盡誠無隱非議戎事未嘗及權數自以
少孤見祿及親者必憮然感傷篤愛親族姑姊數
人孀且老皆迎以歸事之甚謹外兄弟甥姪悉爲
具婚嫁清約自守家無餘貲諸子皆訓以經藝例
恩得任子多抑之須其成立然後奏以官及公之
終未官者猶三人夫人羅氏諫議大夫延吉之女
鄴紹威之孫封宜城縣君子六人球湖州德清
尉瑄將作監主簿琚司封員外郎玩河陽司法叅
將軍璵著作佐郎琦右諫議大夫樞密副使一女
嫁西上閣門使高志寧樞密之兄姊今無存者初

司封登朝與樞密並贈公吏部尚書慶曆三年樞
密追榮三代贈公太傅妣羅氏追封仁壽郡夫人
大父贈太子少傅妣李氏封趙郡太夫人曾大父
贈太子少保妣張氏封清河郡夫人五年二月
日樞密奉公夫人之喪歸葬於相州安陽縣之新
安村距祖塋三十里其銘曰

韓氏自唐載德以世丁時孔艱秉節愈厲公奮在
初才克有試曰州曰邦以功以事豈不較利通久
勿儻亦旣立法究窮固戮布威東夷申化南裔維
皇之咨宜輔於治若時之臆則協於義年胡弗淑

位胡弗至靡人不嗟彼含誰懟在子而昌實公之
嗣袞服以章葬則有制豆籩式嘉祭則備器孝子
有家傳千百祀

故兩浙轉運使朝奉郎尚書司封員外郎護

軍賜紫金魚袋韓公墓誌銘并序

公諱琚字子溫相州安陽人右諫議大夫贈太傅
諱國華之第三子幼敏惠太傅愛異諸子凡有誤
述令執筆口授之由是盡得屬辭之體以蔭試將
作監主簿調饒州鄱陽尉大中祥符七年求應進
士舉郡守江嗣宗素未知名一日召登郡閣出鴻

雁來賓賦題以試之公少頃即就格致清麗有唐
人之風江大稱賞即時薦送江左有書其賦於屏
者其愛重如此明年中第授太常寺奉祀部知河
南府永寧縣事時王公嗣宗守河南政尚嚴察束
官吏一以法細民或縣訟不勝率走府自直屬官
畏縮益煩慮不任事頗以疲軟罷永寧在河南名
最劇縣公年少果敢善決斷民吏愛伏王公嘉之
遂不奪其治且薦于朝用薦移通判廣信軍事丁
內艱服除累遷光祿丞祕書太常丞歷通判趙祁
處三州事處於江西號難治民喜訟或僞作冤狀